

E tribune di Ser'i Noka, un joya asombroso! Ken a construye?

○ SER'I NOKA · TUESDAY, OCTOBER 8, 2019 · 6 MINUTES

Manera cu den nos notanan anterior ya nos a haci conoci, e teatro di Ser'i Noka a wordo inaugura riba 8 di December 1963.

Hopi liher e anfiteatro unico aki den aire liber a bira un di e structuranan mas gusta y stima serca e gran mayoria di nos poblacion. E tabata un sitio magico y encanta caminda nos hendenan tabata bini hunto pa disfruta sanamente y comparti momentonan positivo hunto. Ta importante pa nos honra nos pasado y pa semper nos keda agradecido na e personanan creativo, visionario y balente cu a percura pa idea, planea y construi e joya aki cu awe definitivamente por wordo considera como nos patrimonio nacional.

Nos a menciona varios nomber di e visionarionan y pioneronan tras di e creacion di e anfiteatro aki, manera entre otro Sr. Domi Tromp, Sr. Piet Eelvelt, Sr. Leonardo "Nadi" Croes, Sra. Yvonne Tromp-Frans y Sra. Nena Vrolijk, cu ta personanan cu a duna tur di nan parti pa haci e esfuerzo di construccion di loke awe por wordo considera como un herencia masha valioso di nos isla. Hopi mas ta e personanan cu a yuda den construccion di loke awe nos mester rescata, restaura, renoba, mantene, proteha y traspasa pa nos futuro generacionnan por sigui desaroya y eleva nan mes y asina cosecha exito continuo.



Publicacion di oktober 1964 den Amigoe di Curaçao.

Un di e componentenan di mas impresionante di e teatro di Ser'i Noka, ta e tribune asombroso dorna cu piedranan di Schist berde cu ta contene e mineral Mica, cu por acomoda 500 persona. Un tribune cu a wordo construi den un tempo record di 2 luna.



Foto saca dia 6 di augustus 2019, cortesía di Edjean Semeleer.

Kende tabata e persona encarga cu supervision y construccion di esaki?

Ta berdad cu e teatro a conoce su apertura na December 1963, pero tabata te na December 1964 cu e tribune a wordo estrena. E biaha ey, pa e obra teatral di Mascaruba: “Navidad di Santa Cruz”.

E cabayero balente cu a percura pa pusha pa logra esaki, por wordo considera como un otro baluarte di e pueblo di Santa Cruz.

Sr. Bartolomeo “Betto” Werleman a nace riba 24 di augustus 1923.

Su mama Logenia “Chichi” Varis y su tata Leoncio Daniel Werleman a forma un famia humilde riba un Aruba hopi diferente cu awo.

E tempo ey, ta te 6de klas bo ta yega den educacion na Aruba.

Den Betto su caso, promer cu e por a finalisa 6de klas, ya e tabata lanta 4’or di marduga pa compañía su tata pa nan bay corta aloë.

Betto a casa cu Marianita Werleman Croes (Machi) na añ 1944. Di e matrimonio aki a nace 7 yiu.

Cu su propio mannan, Betto a traha su mesun cas na Macuarima.

Asina cu un yiu mas tabata na caminda, e tabata traha un camber acerca. E tempo ey, e tabata cumpliendo cu su deber como Soldad na Mariniers Kazerne. El a traha duro y a logra



yega e rango di Sergeant.

Durante Segunda Guerra Mundial,

Betto a yuda defende Aruba.

Betto hunto cu su esposa Marianita "Machi".

Betto tabata traha warda na Lago y despues di trabou e tabata pisca.

Tambe e tabata tin un cunucu unda e tabata planta. Despues cu Lago a haci su prome Layoff, Betto tabata den e grupo ey y el a wordo manda cas.

Aki el a drenta den e arena politico hunto cu Leonardo "Mo Nadi" Croes y Juancho Yrausquin di e partido PPA, cu tabata e partido mas grandi e tempo ey.

Ora e partido aki a drenta gobierno, nan a lanta un departamento cu a wordo yama:

"Werkverschaffing."

Betto tabata guia e trabounan di e departamento aki na pia di construccianan cu a wordo haci rond di Aruba. Sitionan unda cu construccionnan a tuma luga tabata entre otro Ser'i Noka, Casibari, Ayo, Grot di Lourdes y Alto Vista.

E cruz riba un di e barancanan di mas halto di Ser'i Noka tambe a wordo traha door di Betto hunto cu Nadi Croes y algun persona mas.

Banda di e trabounan di e departamento, Betto tabata yuda cu mantencion di Santana na Santa Cruz y tambe cu renobacion di e misa di Sta Cruz.

Asina cu e scolnan na Santa Cruz y e convento di Surnan yam'e pa cualkier ayudo, e tabata t'ey pa yuda construi y verf.

Apesar di tabata ocupa cu su trabounan, semper el a sigui pisca y planta den su cunucu. E tabata duna esnan cu no por a paga, un pisca y fruta pornada of na un prijs alcansabel pa nan. Cu nostalgia su famia ta conta con nan ta corda cu semper ora un hende yega Macuarima 16 cerca Betto, e ta sali cu un saco di mango of mispel of un papaya pa nan bay cu ne. "Bo no por laga e hende bay man bashi", e tabata bisa.



Varios persona cu a conoce Betto, ta describi'e como un ser humano cu un curazon di oro. Semper cla pa yuda su prohimo, sin spera nada a cambio.

Na aña 1995, Betto a ricibi e reconocimiento di Koninklijk besluit: 95.003113
Onderscheiding: EreMedaille in Zilver.

Riba 25 di April 2009, cu 86 aña di edad, den compania di su casa y yiunan, “Pachi Betto” a bay sosega.

Su memoria ta keda bibo den nos curason y nos ta contento cu su trabounan humilde pa Aruba te ainda ta resona y por wordo admira.

Nos ta sigur cu si e tabata na bida awe, e tambe lo ta masha orguyoso di mira su obra asombroso den Ser'i Noka wordo rescata, restaura y protehi pa hopi mas generacion por sigui disfruta di dje.

[Go Cultura Foundation](#) hunto cu Parokia di Santa Cruz encabesa pa Pastoor [Jairo Maduro](#) ta sigui haci e esfuerzonan maximo pa rescata e teatro aki y restaura su magia y encanto pa tur hende por sigui disfruta di dje y wordo inspira.

Uni bo mes na e hazaña historico aki. Bishita [Gocultura.org](#) pa mas detaye, informacion y pa bo haci bo donacion.

Gradicimento hopi special na famia di Sr. Betto Werleman pa e informacion y potretnan di Sr. Werleman.


Betty Werleman Rosabelle Chuchi Illes Rodi Illes Nohely J. Sanchez Roos Werleman
Werleman Roos Mena Werleman Ivo Yanez Irayka Yanez Luci Werleman

Fotonan antiguo: “Amigoe di Curaçao”, Delpher.nl

“Arubaanse Courant”, [Coleccion digital Departamento Arubiana-Caribiana](#)



Publicacion di November 1964 den Arubaanse Courant.



Publicacion di 10 di december 1964 den Amigoe di Curaçao. Aki nos por mira cu e tribune a keda cla. Asina tambe anticipando e estreno di e obra "Navidad di Santa Cruz" cu a tuma lugar riba 12 di december 1964



E cruz di piedra riba un di e barancanan mas halto di Ser'i Noka, inaugura riba 12 di April 1968. Publicacion den "Amigoe di Curaçao", 9 di April 1968 anunciando e realisacion di e trabaonan di construccion di e cruz hopi simbolico aki.